

釋

文

紀

六

欽定四庫全書

釋文紀卷九

明 梅鼎祚 輯

晉

七 以下僭國
後趙 前秦

前燕

南燕

後秦

後趙主石勒

字世龍上黨潞人始事
劉淵其位攝趙王居鄴

尊佛圖澄書

澄見後

和尚國之大寶榮爵不加高祿不受榮祿匪顧何以旌

德從此已往宜衣以綾錦乘以雕輦朝會之日和尚升

殿常侍以下悉助舉輿太子諸公扶翼而上主者唱大

和尚衆坐皆起以彰其尊高僧傳

石虎字李龍勒從子弒勒子自立稱帝

下中書料簡沙門書虎僭號建武時百姓因佛圖澄率多奉佛皆營造寺廟削

髮出家虎乃下書問中書令中書著作郎王虔等奏中書令王波亦同度議虎以澄故復下書

于是慢戒之徒因之以厲

佛號世尊國家所奉里閭小人無爵秩者為得應事佛

與不又沙門皆應高潔貞正行能精進然後可為道士

今沙門甚衆或有姦宄避役多非其人可料簡詳議真偽

中書著作郎王度奏

夫王者郊祀天地祭奉百神載在祀典禮有常饗佛出西域外國之神功不施民非天子諸華所應祀奉往漢明感夢初傳其道唯聽西域人得立寺都邑以奉其神其漢人皆不得出家魏承漢制亦循前軌今大趙受命率由舊章華戎制異人神流別外不同內饗祭殊禮華

夏服禮不宜雜錯國家可斷趙人悉不聽詣寺燒香禮拜以遵典禮其百辟卿士下逮衆隸例皆禁之其有犯者與淫祀同罪其趙人為沙門者還從四民之服

復下書

度議云佛是外國之神非天子諸華所可宜奉朕生自邊壤忝當期運君臨諸夏至於饗祀應兼從本俗佛是戎神正所應奉夫制由上行永世作則苟事允無虧何拘前代其夷趙百蠻有捨於淫祀樂事佛者悉聽為道

士並高僧傳

竺佛圖澄

天竺人本姓帛氏少學道妙通玄術晉永嘉初來洛陽已從石氏終鄴宮寺

謝石虎勞問書

澄從石勒甚見篤信號大和尚及虎僭位傾心事澄澄稱疾虎勤遣

勞問澄謝虎

陽月和煖願御膳順宜貧道先嬰重疾年衰益甚邈蒙
慈詔曲垂光慰感懼之至十百于懷幸遇慶會而形不
自運此情此慨良無以喻

辭石虎書

澄自啟瑩墓於鄴西紫陌謂弟子法祚曰禍亂漸萌吾先從化矣臨化遣人辭

虎

物理必遷身命非保貧道欲幻之軀化期已及既荷恩

殊重故逆以仰聞

並高僧傳 按此雖不明言書然非面語

前秦主苻堅

字永固畧陽氏人為秦龍驤將軍弒主自立稱大秦天王居長安

與朗灋師書

朗以秦皇始元年移卜太山頃乃於金輿谷崑崙山中別立精舍堅欽其

德素遺使觀遺

皇帝敬問太山朗和尚大聖膺期靈權超逸蔭蓋十方
化融無外若山海之養羣生等天地之育萬物養存生

死澄神寂妙朕以虛薄生與聖會而隔萬機不獲輦駕
今遣使人安車相請庶冀靈光迴蓋京邑今并送紫金
數斤供鑊形像絹綾三十疋奴子三人可備灑掃至人
無違幸望納受想必玄鑒見朕意

竺僧朗答秦主苻堅書

僧朗頓首頓首如來永世道風潛淪忝在出家栖心山
嶺精誠微薄未能弘匠不悟陛下遠問山川詔命慙慙
實感恩旨氣力虛微未堪跋涉願廣開灑輪顯保天祚

蒙重惠賜即為施設福力之功無不蒙賴貧道才劣不

勝所重僧朗頓首頓首

廣弘明集

尊朗澹師詔

堅沙汰衆僧欽太山僧朗德素乃別詔

朗澹師戒德冰霜學徒清秀崑崙一山不在搜例

高僧傳

趙整

字文業一名正畧陽清水人仕苻堅秘書侍郎

釋迦頌

整因關中法盛欲出家堅未許及堅死遂更名道整作頌專精經律終于襄陽

我生何以晚泥洹一何早歸命釋迦文今來受大道

高僧傳

傳

前燕主慕容垂

字道明鮮卑人號子封吳王奔
苻堅後叛秦自稱燕王居中山

與朗灋師書

皇帝敬問太山朗和尚澄神靈緒慈陰百國凡在含生
孰不蒙潤朕承藉纂統方夏是膺晉蜀不恭魏武含慨
今二賊不平朕豈獲安又元戎剋興征掃暴亂至人通
靈隨權指化願兵不血刃四海混伏委心歸誠久敬何
已今遣使者送官絹百疋絮染三領綿五十斤幸為咒
願

僧朗答燕主慕容垂書

僧朗頓首頓首能仁御世英規遐邇光敷道化融濟四海貧道忝服道味習教山林仰惟詔旨諾及國難王者膺期統有六合大能并小自是常倫若葵藿之傾太陽飛步之宗麟鳳皇澤載融羣生繫仰陛下高明何思不服貧道窮林蒙賜過分僧朗頓首

廣弘明集

南燕主慕容德

字玄明號少子初為後燕主慕容寶丞相據廣固自稱燕王

與朗灋師書

皇帝敬問太山朗和尚遭家多難舊禍屢臻昔在建興
王室西傾賴武王中興神武御世大啟東夏拯拔區域
遐邇蒙蘇天下幸甚天未忘留武王即晏永康之始西
傾東蕩京華播越每思靈闕屏營飲淚朕以寡德生在
亂兵遺民未幾繼承天統幸和尚大恩神祇蓋護今使
使者送絹百疋并假東齊王奉高山荏二縣封給書不
盡意稱朕心焉

建興乃後燕主慕容垂廣弘明作建興
誤武王為垂孫盛廣弘明寡作無統

作祿

僧朗答南燕主慕容德書

僧朗頓首陛下龍飛統御百國天地融溢皇澤載賴善
逢高鑒惠濟黔首蕩平之期何憂不一陛下信向三寶
恩旨殊隆貧道味靜深山豈臨此位且領民戶興造靈
刹所崇像福冥報有歸僧朗頓首頓首

又報慕容德

德初僭位都滑臺尋為魏所據議欲先取一方為關中之基中書令

張華議主彭城北地王鍾等勸復攻滑臺尚書潘聰以滑臺四通八達非帝王之居彭城土曠人稀非久安之計青齊沃壤固山負海號曰東秦當進討叛臣辟閭渾而據廣固德

未決僧朗素善占候使牙門蘇撫訪其所適
朗報德德引師而南徐充歸附渾奔魏追斬
之以廣固都焉是年為朗建神通寺于齊州
仍遺書朗撫常問燕年世朗筮之曰燕衰庚
戌年則一紀世則及子
言皆驗 此報在前

山野絕俗之士不應預聞朝議但有待之累非有託無
以立陛下今即聞之檀越敬覽三策潘尚書之議可謂
興邦之策矣且今歲之初彗星起於奎婁遂掃虛危彗
者除舊更新之象奎婁為魯之分野虛危為齊之分野
宜先定兗州巡撫琅邪待秋風戒節然後北轉臨齊此

天道也

並十六國春秋南燕錄

後秦主姚興

字子畧本赤亭羌襄子襲位去帝號稱秦王居長安

與安成侯姚嵩述佛義書

興少崇三寶銳意講集什既入關多所傳譯興

惟佛道唯善信為出苦之長津御世之洪則乃著通三世論勗示因果以詰什什答書復與嵩

述之

嵩見後

吾曾以已所懷疏條摩訶行諸義圖與什公評詳厥衷
遂有哀故不復能斷理未久什公尋復致變自爾喪戎
相尋無後意事遂忘棄之近以當遣使送像欲與卿作

疏箱篋中忽得前所條本末今送示卿徐徐尋撫若於
卿有所不足者便可致難也見卿來日並可以當言笑
吾前試通聖人三達觀以諮什公公尋有答今並送往
諸此事皆是昔日之意如今都無情懷如何矣

通三世論

諮什
法師

曾問諸法師明三世或有或無莫適所定此亦是大法
中一段處所而有無不泮情每慨之是以忽疏野懷聊
試益浪言之誠知益浪之言不足以會理然習襟之中

欲有少許意了不能默已輒疏條相呈匠者可為折衷
余以為三世一統循環為用過去雖滅其理常在所以
在者非如阿毗曇注言五陰塊然喻若足之履地真足
雖往厥跡猶存常來如火之在木木中欲言有火耶視
之不可見欲言無耶緣合火出經又云聖人見三世若
其無也聖無所見若言有耶則犯常嫌明過去未來雖
無眼對理恒相因苟因理不絕聖見三世無所疑矣

鳩摩羅什答後秦主姚興書